

nostro in Spagna, che 'l possi portar con si ducati 400 di arzenti, a risego di la Signoria.

Fu posto per sier Antonio Trun, procurator, savio dil consejo, dar a madona Lugrecia, fo favorita dil signor Lodovico, certò dazio di Chavarazo, per la soa dota di lire 6000, *ut in parte*; qual prima li era ubligato. Contradise sier Pollo Pixani, el cavalier, savio dil consejo; il Trun rispose. Et andò la parte; non fu presa di do ballote.

Fu posto per ditto sier Antonio Trun, sollo, dar a li frati di Santa Maria di la Scala di Milan, à intrada sul cremonese, che siano asolti di decime; et li savij, a l'incontro, messe star sul preso. Il Trun ave 8 ballote et non più.

Et se intese, che una nave zenoese, qual era carga di mori di Barbaria, magrabi, andavano in Alexandria, per numero 600, par a Rodi sia stà presa, e fato schiavi, e doble 80 milia, botte di oio in zare 1200, telle carpete et altro per assa' valuta, richa di ducati . . . ; sì che rodiani, con intelligentia dil patron di la nave, ch'è zenoese, Negrin, à 'uto tal butim etc.

Da poi leto le letere im pregadi, fo chiamà consejo di X. Et fo preso di restar tutto il mexe di zener a far, in locho dil Zorzi Emo, dil consejo di X, atentò è a' nostri servieij.

A dì 29. Fo consejo di X. Fato capi di X di zener: sier Alvixe Arimondo, sier Nicolò di Prioli et sier Alvixe da Mulla; et fo con zonta. Et *dicitur*, sier Piero Trivixam, da la dreza, qual fo chiamà per revelation di stado et monede falsse, havia dà una scrittura al consejo di X, volea salvo conduto di le monede, e presentarsi per il stado; et poi suplichava esser confinà a Padoa, dove la soa persona fusse secura da li creditori, per esser debito ducati assa'. Et non fo acetà.

A dì 30. Fo *etiam* consejo di X. Et fo spazà do de quelli veronesi, zoè il fator e uno altro, e lassati andar; il restò fonno retenuti. Cussi *etiam, dicitur*, fo spazà e asolto quel faventin.

Gionse e intrò do galie sotil di 6 mexi, sier Zuan Moro, *quondam* sier Antonio, et sier Vicenzo da Riva. Referiscono, le galie di Baruto, capitano sier Marco Loredan, *quondam* sier Antonio, cavalier, procurator, sopra Sapientia aver combatù do barze di Piero Navaro, corsaro, qual havia preso 3 charavele, do di nostri subditi et una forestiera, con formenti; et quelle havia recuperate. *Item*, che a Corphù era nove, Sophi prosperava contra Alidulli.

A dì 31. Da poi disnar non fo 0.

*Proclama fata far per le chiesie per li proveditori sopra le pompe.*

I magnifici signori sopra le pompe fano asaper la parte a cadauna persona, che se *de cætero* sarà trovato, si maschio come femina, de che conditione esser se voja, che ardisca portar manège postize cavade fuora, nè con lavorieri, nè manège de vesta, nè manège de investidura, large con più de braza do el paro, non tajade nè lazade, nè investidura con coda, nè vesta con coda longa più de quarta una, nè più de una cadenella schieta che non sia falssa, nè perle, salvo che un fil al peto davanti, che non passi la parte de alcuna altra cosa de veduta de lavorieri suso i casi, o ver manège, così d'oro come de seda o ver altro, sarano condanadi inremissibilmente, secondo la forma de la leze; et oltra di questo sarano spojadi li vestimenti e zoje che lhor averano a dosso, e sarano persi. Et se 'l sarà schiavo o schiava, che acuserà, sarano franchi et liberi; et se 'l sarà famejo o ver fantescha, scritta o ver a salario, se intenda aver compido el suo tempo, et habia tuto el suo salario, et oltra di questo la parte de la condanason.

Questo mandato fo publicà per tre feste a la messa granda, dil mexe di dezembrio 1507.

*Dil mexe di zener 1507.*

124

A dì primo, fo il zorno di anno nuovo. El doxe fo, con li oratori, a messain chiesa di San Marcho, *de more*. Post 0 fu.

A dì 2. Fo gran consejo. Et fu posto per li consieri, che sia dato licentia a sier Hironimo Contarini, è capitano a Ravenna, qual è electo provedador di l'armada, che 'l possi vegnir in questa terra, *licet* il suo successor non sij andato, a zio possi armar. Ave 200 e più di no, 1000 e più de sì; e fu presa.

A dì 3. Da poi disnar 0 fu. Vene sier Olivier Contarini, venuto retor e provedador da Catharo, et referi in colegio.

A dì 4. Fo pregadi. Et leto le infrascripte lettere:

*Di Verona, di rectori, et sier Zorzi Emo, provedador zeneral. De occurrentiis.* Et farà le mostre a le zente sono li.

*Di Brexa, Riva, Roverè et Udene.* Reporti di exploratori. In conclusion, il re di romani si aspettava a dì 4 a Bolzam, a la dieta. Et uno explorator dice aver scontrà il re con cavali 400, veniva verso Bolzan, di qua de Yspruch; et in questo numero non